

**Illunut sanaqataaffiusunut aaqqissuussinerup atorunnaarsinnissaanik Naalakkersuisut peqquneqarnissaanik Inatsisartut aalajangiiffigisassaattut siunnersuut.**  
(Inatsisartunut ilaasortaq Niels Thomsen, Demokraatit)

**Akissuteqaat**

(Ineqarnermut, Attaveqarnermut Angallanermullu Naalakkersuisoq)

**Siullermeerneqarnera**

Naalakkersuisut aalajangiiffigisassatut siunnersuut saqqummiunneqartoq pillugu qujapput, tassanilu tungavigineqartut pingaarutillit pitsaasullu saqqummiunneqarput, siunnersuumminngaaniillu ukua immikkut erseqqissassallugit: *"Taamatut aaqqissuussisimaneq Demokraatit tunissutitut isigaat. Assut naapertuilluannngitsutut nalilerparput annerusumik annikinnerusumilluunniit illut inunnut najugaqarfinni aalajangersimasuni najugalinnut imaluunniit aalajangersimasumik isertitalinnut tunniussorneqarnerat, massa nunap innuttaasuisa sinneri amerlanertigut illoqarfinni annerni najugassaqarnermut aningaasartuuteqartariaqartartut qaammammut 10-15.000 koruuninik namminneq piminni najugaqarusukkunik. Oqariartuuterput tassaavoq inuiaqatigiit tapiissutinik isumalluuteqarfiusut qimakkartornissaat. Inuiaqatigiinnik naapertuilluarfiusunik pilersitsissaagut, arlaannaalluunniit pisariaqanngitsumik ersoqatiginninngitsumillu tunissutinik pisaratik."*

Naalakkersuisut siunnersuut isumassarsiatsialattut isigaat, kisiannili isummersuutiminik imaattunik saqqummiussissallutik. Peqqussutissatut siunnersuutip 2007-imi ukiakkut ataatsimiinnermi (UKA 2007/44) saqqummiunneqarnerani Demokraatit oqaaseqartartuat ilaatigut imatut oqarpoq: *"Peqqussutissatut siunnersuummi uani selvbyggerhus-it medbyggerhus-itut allanngortinneqarnissaat piumaneqarpoq. Tamanna Demokraatinut pingaarluinnartuuvoq illuliornissamat piffimmi sanasumiit iliuusissamik siunnersortinnermut ikiortinnermullu qinnuteqarnikkut tapiiffigineqarsinnaanikkut Kalaallit Nunaani illuliassaraluit sumiginnakkat sumi tamaani takussaasut pinaveersaarneqassammata. ... Demokraatit siunnersuut ineqarnermut ataatsimiititaliamut suliarisassanngorjaa aappassaaneerneqarnera pinnginnerani."*

Peqqussut Inatsisartuni suliarineqarmat Demokraatit aaqqissuussinerup allannguinnissamat piumassuseqarluarput, ullumikkulli paasivarput, nammineerluni illuliortarnerup taartaa, tassalu sanaqateqarluni illuliortarneq tamanit neriuutigineqartutut iluatsissimannngitsaq. Illumik nutaaliaasumik sananeq pisariusuuvoq, sanasutut piginnaaneqarluarnissamik pisariaqartitsiviusoq. Nammineerluni illuliani pitsaassuseq, taamaalillunilu pisariussuseq ukiut kingulliit 30-it ingerlanerini annertusingaatsiarsimavoq. Paarlattuanik aamma nammineerluni illuliortoq annertunerusunik piumasaqarfiusalersimavoq. Nalorniffiusoq taanna Naalakkersuisut eqqumaffigaat, aammalu nammineerluni illuliortarneq imaluunniit sanaqateqarluni illuliortarneq, piginnittup sanaartornermi atortunut akiliiffigisassaa ineriartorteqqinniarlugu illuliassanik pisariunnginnerusunik ineriartortitsinissaq siunissami sulinissamat ilaatinneqassaaq.

Naalakkersuisut taamatut naatsumik oqaaseqarlutik siunnersuut taamatut iluseqartillugu akuerinngilaat, kisiannili sammisaq Akileraartarnermut Atugarissaarnermullu

Ataatsimiitaliap inassutigisaatut ineqarnermut suliassaqarfimmi iluarsaaqqinnissamut  
ilaatinneqassasoq inassutigissallugu.